

# 引言

人子于父母之亡也，为之宅兆以安厝之，为之宗庙以时享之。盖葬以礼，祭以礼，事亲之始终靡可一缺焉者。睹昔伯有之厉，若有待于人为之所者，若敖之馁君子伤之，是血食诚至重也。

呜呼！人孰无亲？阿谁非孙，心非木石，忍薄其祖若父哉！此祠墓志之所由作也。著今昔之故，俾人知之，俾世守之。唐令公总祠创者安成，各支分祠随有随载，无则阙。墓已载各系下，此不过揭上世名墓，亦防侵占，具载茔域梗概，俾族之远裔知所瞻敬云。